

四庫全書

集部

欽定四庫全書

至正集卷二十八

元 許有壬 撰

絕句

仲達送予至湘陰別後順風比晚行三百里悵然
有懷作二絕寄之

吾子才華我最知鬢毛回首各成絲
汨羅江上一杯酒萍水相逢又幾時

江離杜若滿汀洲
騷國春來亦可愁
一日順風三百里
故人何處望予舟

無題

去年曾約牡丹開
同向花前把一杯
今日花開人不見
對花無語却歸來

原功題馬宣使墨蘭二幅後云寄予一笑因次韻
書其側且寄原功

畹香連水水連天
人到湘皋骨已仙
薄領如山空看畫

江南秋色正清妍

秋蘭香裏翰林家只寄新詩不寄花
應笑塵纓戀京國
豈知心在楚天涯

題姑射乘龍圖

姑射仙人昔住山乘龍飛去幾時還
只知堯舜如陶鑄
不道聲名墮世間

題三教啜醋圖

吾儒風味格堅頑二氏而今亦慕酸
涓滴沾濡已如此

鼻容三斗故應難

貢院陪諸公夜話俄聞曉鐘

燭花簌簌褪春紅
睡思消磨語笑濃
底事東風敗人意
半天吹響五更鐘

催諸公考卷

添燭須教夜達晨
繼茶莫遣睡欺人
城南桃李城東柳
政好聯鑣管領春

雄飛和詩未至以二口號速之

騷壇紀律素嚴明一幟撓風到處羸何事而今苦慙
有人乘夜欲登城

兩廳形迹馬牛風盡日相望杳靄中恰似蓬山三萬里
懷人何處覓詩筒

何國器以精藝受知出而徵入者數矣出守江陰
尚慮其不果行也書以贈之

華髮蕭蕭舊秘書木天圖籍幾勤劬莫教作郡江南去
天子時時幸石渠

過街塔原功名之曰雪竇又謂之名利關竇言其
狀關言其實也過之有感賦二口號

來往憧憧急欲飛此關參透古來稀老夫今日出關去
却是罷參真欲歸

石城瓊壁聳浮屠一竅開通作要途為問幾人能不竇
更從竇外覓江湖

歲晚喜晴

窮冬長路遽跋跋風景彌旬暖似春造物見憐知有為

平生真是負暄人

車中戲作

不是車中有布乎亦非客子事狂圖却須側掛一壺酒
道路荒涼無處沽

贈胡謙牧

尋常公署復朝參會面何由一接談却是老天相補報
直教聯轡過燕南

獨樂臺用眠分黃犢草坐占白鷗沙為韻分賦得

首尾二字

疎慵閉戶事高眠
幾負郊原雨後天
今日野心收不定
馬家莊上好林泉

濺濺流水抱村斜
半入疏畦半漚麻
故里溪山足風物
慎毋重踏一堤沙

題仇公度總管首陽采薇圖

史遷怨氣因舒泄
吏部雄文痛發揮
盡美未能兼盡善
益知周粟不如薇

吳道子周處磨劍圖

長蛟猛虎不難屠大勇其惟改過乎
拋却步光為善士方知自礪有工夫

范寬積雪圖

罔巒樓閣闢清妍一段空明水玉天
不到闌城東向望范家神妙若為傳

薛思孝夢菊堂

華胥鄉裏有東籬冉冉寒香步步迷
政爾神交陶靖節

月斜霜落忽聞雞

題明道贊後

房希文教授求題

聖遠經殘道晦蒙茫茫千四百年中墓頭兩字形容盡
未可尋常議潞公

七賢過寒林圖為蔡仲謙運使作

竹林陳迹已無稽作者千年復有誰
搢拙爐邊不安坐
天寒日暮欲何之

溫子昂畫天王

萬年麟史著尊稱底事空門妄欲爭尺許斷縑何足咎
古來多少盜虛名

李將軍畫馬用班彥功韻

真龍幻出笑談間想像初離十二閑只恐風雷終變化
九天飛去幾時還

寄李仲舒二首

東門暫別已傷神驛騎何堪又海門明日洹溪桃李下
春風誰與共清尊

水曹清貴治吳邦更有風烟助錦囊
後夜吳松江上月多應移照栢臺霜

題崔鑑泉署丞作春山隱秀扇面

半生給事五雲間慣作蓬壺富貴仙
移入月輪收不住光風浮出翠孱顏

米元章臨歐陽詢帖

米家神俊不可遏時學歐陽險勁書
只道叔敖無少異豈知優態未能除

高宗臨王羲之七月帖

帝王言道不言書況復時丁板蕩餘偶效右軍書七月
中原王業定何如

王右軍屏風帖宣和所收

鼠鬚繭紙久消磨誰信王書世不多片楮多應有神護
永和流播到宣和

高房山青山白雲圖為蔡仲謙運使賦

房山人品素高賢流出天機肺腑間一片冰紈才數尺

幾重雲樹幾重山

再用鮮于伯機郭安道韻題房山畫二首

亂雲斜日遠冥濛
樵徑縈紆一線通
可笑無根滿林樹
春風才發又秋風

杳杳層樓出半山
森森寒木護重關
白雲不去為霖雨
要與青山一樣閒

題李師孟嵩雲堂

極天終古翠巍巍
能聚陰陽贊化機
寄與降神申甫輩

出為霖雨莫忘歸

甲申元日春帖

雪消春意便暄妍
靜看天機善
幹旋試筆鯨川記風景
青天白日甲申年

題羣魚圖

名品雖殊樂意均
藻香蒲軟一湖春
莫言惠子非知者
猶勝臨淵羨汝人

蘇彥良西塾堂四絕

春雲護雪未全消
老栢垂冰冷不搖
鴈柱十三絃上月
酒闌香燼可憐宵

玳筵紅袖不知寒
春在歌喉暖響間
我輩年來要陶寫
好將西塾作東山

蒼苔滿徑樹連村
中有幽人屐齒痕
此去客來宜定約
無詩無酒不開門

築堂西塾事西疇
桃杏才春麥又秋
慎勿下堂東向望
禺商毫末拂牙籌

安平孫茂實九十八不衰諸公有詩賀其高年者
德

九十八年猶矍鑠百千萬事任浮沈郊原杖屨親朋酒
此是期頤未了心

題對鏡寫真圖用滕玉霄韻

鏡中几上共三人為問先生孰是真自古聖賢皆不死
猪生何足託吾身

題千葉桃圖

五出凡花一掃空萬重千疊裏春風連昌有竹堪為侶
底事牆頭簌簌紅

敗荷驚鷺扇面

葦折荷枯水有聲埜塘斜日影伶俜鷓鴣班裏忽飛去
點破西山一段青

題和叔扇頭時坐登瀛樓

樓居高出白雲間不為求仙只為山領取烟嵐無限景
天教吾與子俱閒

天寧方丈題和叔扇頭

涼颼深殿度颼颼
老栢踈篁已報秋
弱水波濤三萬里
人間自有小瀛洲

陪明初行獨樂臺溪邊得口號

寒波清淺帶霜流
不到溪邊不見秋
疊嶂層崖三百轉
樹梢擎出月如鉤

次白公嚴韻謝其寄酒與柑

任城綠醕侑黃柑
遠寄山中豈所堪
香霧喚人醒易解

不教飛夢到江南

題弄花香滿衣圖

水綃桂襖縷金裙浮動紅芳亂綵雲捲却六銖春沁骨
荀郎無復事爐熏

理宗書金丹詩

以下四首題翰長開府公卷軸

常笑秦皇與漢皇一生徒夢白雲鄉東南最爾垂亡國
猶說金丹事渺茫

杜子美騎驢醉歸圖

田翁招飲不須沽時事多憂一醉除天子乘驄蜀山險
浣花溪上分騎驢

竹

玉立蕭森幾百竿陰晴風雨各平安石兄節操不可轉
宜與此君同歲寒

虎

畫虎不成常類狗伊誰畫狗却如獅世方取貌不求實
猛獸滿山知不知

城樓暮靄

以下八首詠東城之景

樓上烟霏暝欲無
樓前車馬正馳驅
幽人不為晨昏迫
只看天然水墨圖

杏苑初春

玄都道士不栽桃
却愛生紅鬧樹梢
此去東風吹不散
仙家自有鳳麟膠

灞蓮香雨

紛紛轂擊復肩摩
有此清連萬柄荷
沈水香中宜早賞

秋聲不似雨聲多

洞陽午碁

琳宮寥閭子聲頻樹影初圓局幾新門外茫茫名利海
可憐柯爛竟無人

西圃晚眺

秋容淡淡映疎雲聊向蒼苔散屐痕欲採紫芝心萬里
斜陽盡處是崑崙

延翠秋晴

霜清水落靜無埃
邀得西山入座來
爽氣已供朝拄笏
烟光更助暮銜杯

女牆積雪

千雉瓊瑤琢不開
隱然凹凸混皚皚
皇州寒盡春如海
不似秦淮月過來

寒林噪鴉

樹梢斜日下遲遲
啼破荒烟揀一枝
不為上林無著處
寒林宜畫更宜詩

至正集卷二十八

欽定四庫全書

至正集卷二十九

元 許有壬 撰

絕句

調趙子期二首

玉堂學士日攻文不識郊原有好春得見杏花千百樹
却因東郭送行人

春來頻約趙崇文同避紅塵踏暖雲底事相逢却歸去

杏花今日雪紛紛

題經筵安全譯史新刻千文賜本二首

芸閣風清晝景遲
諸生毛穎侍多時
吾皇游藝超今古
能事猶推智永師

隋僧變滅等浮雲
七十三行墨尚新
閣本重翻鐵門字
聖恩均到石渠人

題趙仲穆二馬圖

曹韓遺跡已無多
松雪堂中見小坡
珍重雙龍莫飛去

人間銅式久消磨

房星淪彩渥洼竭神物誰令畫得成幸自天閑異虞

闕

忍教立仗不教鳴

題愛蓮圖用卷中魯子暈韻二首

光風霽月不可見奔軼誰能繼絕塵看取芙渠葯中意
一番花發一圖新

昭昭無極發天倪底事之人路尚迷但使愛蓮知所愛
世間何水不瀟溪

題段吉甫助教武夷山圖

千崖樓閣濕青紅一水盤迴萬壑通
不為風烟有佳色紫陽道氣在山中

題單父宋希賢孝友詩卷

家貧身壯贅它門有志渾如不贅人
致樂致哀終子職肯教秦法變彝倫

和神保欽之御史監試上京韻四首

蹕林雲霧護皇州貝闕珠宮遠似浮
驄馬歸時人盡道

槐花開徧上林秋

灤水天家第一州
赤霄樓觀紫烟浮
因君記我昔此後
二十五番鴻鴈秋

茫茫九點認齊州
大地如舟日夜浮
龍虎臺前新雨露
人間無此一天秋

醉眼曾空十二州
肯隨人海共沈浮
白頭不用悲陳迹
木落霜清恰見秋

次巴克實彥卿雪中見示韻六首

朦朧曉霧勒晨光一樣隆寒兩月強欲和陽春呵凍硯
老夫持酒手猶僵

殘雪虛窓夜有光小齋清話意差強江南不寄梅花信
冷眼空看萬水僵

東華射圃接天光日日趨朝看晚強白髮無能思補報
肯矜霜簡幾人僵

曾向騷壇接步光將雖云老尚兵強莫言白戰無英氣
百足商鉅死不僵

晁朗江天炫日光玉峯寒立闢高強自然有類昌黎筆
籍湜誰能走且僵

誰因景物競流光為學終身貴自強身立程家門下雪
從知寒氣豈能僵

題岳陽樓圖

為鄂諾參議賦

憶昔登樓得句新君山湘水共無塵而今見畫思陳迹
深愧先憂後樂人

題滕王閣圖

賜麻帝子久無聞南浦西山自雨雲遂使閣名傳不朽
却因駢儷一篇文

謝淮東廉司經歷馬九霄畫鶴見寄

騎上揚州不可招一朝蛻影入冰綃凡夫豈敢留仙驥
却遣銜書赴九霄

題澹然平章鷗子

西風涼動早秋天小雀何須畏杜宣見說微形多變化
好為布穀莫為鷗

題明初扇

廣文庭下草青青絳帳秋風一夕生
詩思莫教鄉思攪江湖華髮我同聲

中秋可行招飲因誦東坡明月明年何處看之句
座中請明初可行各和其韻予得二首皆用三疊
體仍命禎賦

夜來風雨不成寒似念幽人在考槃
老夫老態月應道明鏡明朝君自看

夜深風露恰知寒風在絺衣月在盤一樽濁酒對明月
千里佳人應共看

題明初所藏暮雲樓閣圖

倚空寒立翠孱顏樓在重雲縹緲間松下罷琴人未去
夕陽應待鶴飛還

題明初所藏青山白雲圖

不成蒼狗不成衣添出峯巒一段奇雲去雲來山自若
笑它前日作霖時

溪上樓

以下八首詠徐氏竹溪之景

一曲清波不受塵倚闌長日翫
奔淪風烟莫道翁收盡
撞透烟樓更有人

竹間樓

高居已是脫卑凡
況在蕭森冷翠間
欲識此君清絕處
盡遮塵俗不遮山

扁舟亭

陸居無屋舟無水
得似先生屋作舟
人海茫茫我何有

且教滿載一天秋

藍田別墅

輞川邱壑蔓寒藤境異心同有此名見說主人惟種德
不須石子玉還生

桂墩

翁家多桂鬱成堆幾度秋風幾世栽好是麟兒成宅相
蟾宮又折一枝回

釣臺

石巖雲矗俯深溪下有清風動一絲我亦忘魚聊復爾
可憐溫水誤昌黎

石塢潭

鄒塢金多竟不存清堅輸與老雲根潭中鱸鮓知多少
已有飛騰過禹門

軍山

昔年屯聚亦偷生今日柴扉夜不扃却羨此山能領會
時危時泰一般青

題子昂竹石

坡仙戲墨是信手松雪晚年深得之兩竿瘦竹一片石
中有古今無盡詩

題班彥功山水扇圖

錢塘江上又秋風老友淪亡夢不通勝槩肯教同羽化
山河寫在月輪中

作樂導水

以下二十四首次可行圭塘雜詠韻

洹溪混混源頭活分得枝流入小塘怪底凝雲吹不散

管絃聲滿水中央

槁楫落成

一竿才空一曲隨
胼胝今日頓忘疲
年來懷抱須陶寫
敢笑長安衆富兒

柳下聽鶯

萬條金縷裊長身
勾引遷喬語意新
休向建章誇百轉
陶家門徑有餘音

舟中對鷺

禪定聯拳斂素裳
豈知船上載紅粧
主人有約休相負
多少魚兒要汝忘

荷觴酌酒

野人飲具謝玻璃
自有天然軟玉卮
蕩漾翠濤擎不定
有人謀笑任淋漓

蕉葉題詩

騷鄉縑楮寓芭蕉
翠瑩尤宜運紫毫
風致於詩真有助
卯君才調況清高

荷淨納涼

柳陰多處著方牀
萬柄無塵各有香
危坐悠然受清供
風聲撼撼更秋涼

開窗看雨

一時清響鬧新荷
其奈龍公不肯多
窗外風光吾不校
四郊禾黍定如何

松陰獨釣

半世京華困鼎茵
高風時復夢玄真
可憐緣木求魚者

今日君其問水濱

與客泛舟

歟乃聲中動畫撓不須舟子更招招而今赤壁荒寒裏
試問何人有洞簫

日夕觀山

林慮千仞翠巘巘罨畫工夫在暮嵐徙倚崇臺觀未足
紅輪西北月東南

西堤晚眺

小亭何用赤闌橋
細柳新荷綠四遭
落日胡床更東望
碧天如水月輪高

雨中移竹

山人聚景作池臺
移得龍孫帶雨栽
頃刻雲開晴日上
便教陰過酒樽來

月下觀梅

空明雲水碧搖沙
疎影尤宜竹外斜
為我殷勤謝僊父
莫疑繁李玉川家

倚檻觀魚

魚樂江湖自不知非魚非我敢相欺
危言我不如莊惠
終日觀魚只有詩

繞堤種菊

紛紛紅紫厭相看老境才將蔗倒餐
不向四堤皆種菊
風霜誰與共高寒

竹間開徑

翠寒深處覆蒼苔香霧霏霏晚自開
從此一筇雙不借

尋詩迎客幾徘徊

水口聽琴

幽栖長物一張琴時對清流自寫心老子興闌童子去
月明懸溜有餘音

獨坐投壺

綠陰清晝矢鳴壺慶馬何煩用酒娛有主無賓聊一笑
却呼僮僕煮臯盧

登臺縱目

老眼常疑萬象低
憑高遠景更萋迷
只從此地觀吾圃
便覺江湖是小溪

調白蓮

仙姿皎潔映圓臺
真見凌波恣意開
却是圭塘宜產汝
朝陽東照玉成堆

調水芙蓉不花

南土風宜陸地蓮
移根培植不能妍
世間久絕司花手
却道殷韓是偶然

調湖石

一卷千古碧崔巍
閱盡人間紫與緋
老子未能兄事汝
醉來聊用掛絺衣

聽箏

冰絃轟列倚歌輕
絃外無聲却有聲
我自忘情聊過耳
幾人聞此發狂醒

酒間得口號二十八字

卯君為我鑿圭塘
荊棘化為雲水鄉
昨夜荷香新雨過

一年勞費盡銷忘

大雨兩晝夜僮屋盡仆惟軒前新竹綽有生意得
二十八字以為口號

一夜銀河瀉欲乾桑田幾似海漫漫岸頽牆仆吾無憾
栽活蒼筤數百竿

雨後觀竹乃有陘塾摧折者數叢因用前韻

憶昨移栽怕雨乾豈期平地水瀾漫此君於我真無負
摧折猶堪作釣竿

聯句

盆菊

霜卉日已腓寒軋層空澄

有士

大明麗若木忽自東海

昇

熙

照我衡茅下南金爛稜層

有士

密葉肥晚翠疎根

瘦秋鷹

熙

睠茲貞淑質夙著隱逸稱

有士

佳名豈易得

高風邈難仍

熙

心將東籬興迹遽華筵登

有士

美人遂

幽討晚歲欣得朋

熙

誰令頽與紫亦復相依馮

有士

黃

裳本元吉間色詎能勝

熙

頎然挺尋丈歌傾待維繩

有士

主植以葛陂杖資以剡溪藤

熙

通譜品逾百口說為爾

膝有主

宗既別大小祖亦殊高會

熙

濃如胭脂沁潤如

酥膏凝

有主

鮮如翦朝霞清如裁春冰

熙

肉色映蒙絺

體素動研綾

有主

百疊甃碎瓊千重感文綰

熙

鶯羽乍

出轂魚鱗駢有稜

有主

亭亭矗巨杯灼灼開華燈

熙

長

身不免弱擎重嗟未能

有主

摘剔留數花花損氣益增

熙

出奇世豈眩奪巧天應憎

有主

人力固云勝物性柰

失恒

熙

平生愧學詩多識猶僂僂

有主

不如坐對之政

似羅豆簞

熙

真趣漸漸得香氣浮浮蒸

有壬

微吟慰晚

節大勝哦松丞

熙

有花思陶潛無酒思王弘

有壬

南陽

飲潭水壽者如岡陵

熙

所以遯世翁有樂在曲肱

有壬

傲睨風露表春花我方憊

熙

況為養性藥服之可騫騰

有壬

當年與花別待漏常雞興

熙

廢爵夢三徑歸田難

荒乃

有壬

三徑幸猶存清興聊復乘

熙

庶幾韋表微千

載驥附蠅

有壬

客來涉吾圃老圃喚不磨

熙

灌溉瓶屢

罄詠歌筆已踰

有壬

身雖老瓦託氣欲南山凌

熙

野人

富勝事行有梅繼承

有壬

此盟未歃血此語已服膺

熙

又恐遠莫移健步勞屨滕

有壬

孤根豈幡然遂用玉帛

徵

熙

彼蕙樹百畝妄以多自矜

有壬

芳枝愧真堅恐負

騷人詆

熙

真賞各有適蜂蝶徒翦翦

有壬

詩壇戰戈甲

齊晉壓杞鄣

熙

尚憐秋如海料之以斗升

有壬

從公勻

一勺臨淵劇兢兢

熙

至正集卷二十九

欽定四庫全書

集部

至正集卷三十三

詳校官編修_臣錢樾

侍讀臣孫球覆勘

總校官降調編修_臣倉聖脉

校對官中書_臣潘曾起

謄錄監生_臣楊簡中

欽定四庫全書

至正集卷三十

元 許有壬 撰

序

文丞相傳序

宋養士三百年得人之盛軼漢唐而過之遠矣盛時忠賢雜還人有餘力及天命已去人心已離有挺然獨出於百萬億生靈之上而欲舉其已墜續其已絕使一時

天下之人後乎百世之下洞知君臣大義之不可廢人心天理之未嘗泯其有功於名教為何如哉丞相文山公少年卓厲有經濟之志中為賈沮徊翔外僚其以兵入援也大事去矣其付以鈞軸也降表具矣其往而議和也萬萬一有濟爾平生定力萬變不渝父母有疾雖不可為然無不用藥之理公之語公之心也是以當死不死可為則為逸於淮振於海真不可為矣則惟有死爾可死矣而又不死非有他也等一死爾昔則在已今

則在天一旦就義視如歸焉光明俊偉俯視一世顧膚
敏裸將之士不知為何物也推此志也雖與嵩華爭高
可也宋之亡守節不屈者有之而未有有為若公者事
固不可以成敗論也然則收宋三百年養士之功者公
一人爾孫富為湖廣省檢校官始出遼陽儒學副提舉
劉岳申所為傳將刻之梓伴有壬序之有壬早讀吟嘯
集指南錄見公自述甚明三十年前游京師故老能言
公者尚多而訝其傳之未見於世也伏讀感慨惜京師

故老之不及見也公之事業在天地間炳如日星自不容泯而史之取信世之取法則有待於是焉若富也可謂能後者已

綱目書法序

朱子感興詩獵舉三朝而不他及其有激於歐馬而綱目之所以作也周不綱非一日至命三家為諸侯則其綱不復可振矣此一書託始之命意也晉史帝魏習鑿齒已病之唐書紀武則范氏之論至矣通鑑千三百六

十二年事如指諸掌偉哉書乎其文則猶史也朱子慨然本春秋之旨任筆削之重主正統以明君臣之分嚴書法以誅亂賊之心其取義大矣永新劉益友先生作書法發明之其徒進士湖廣省照磨馮君敬修欲其說暴於世畢抒其概噫朱子之心憂世甚至非矛盾溫公者也民彙物則之所係則因草生焉諸侯僭王則貶稱君無正統則並書不相下帝昭烈以明正統書在房以合乾侯死揚雄之仕莽卒陶潛而係晉皆凜乎斧鉞其

筆君臣之大義明矣他如與義微旨益友之撒覆發其
韞殆無餘焉若夫開卷之初命三家率舊文者終卷非
一義苟至當吾何異焉蓋綱目成讀通鑑者有所折衷
而亂臣賊子無所逃罪矣二書可相有而不可相無者
也益友之書適而不牽會而不掇智周於理而力周於
文矣或謂孔子作春秋三傳且相異同朱子學孔子者
益友書法果盡合朱子之心乎予曰朱子之書主褒貶
其心易知也昔之書今之削昔之遺今之特書揆之以

始末律之以凡例舉此以見彼寓微而示顯者益友之
綜覈精矣竊嘗一二致疑沉潜反覆祇見目力心思之
不逮而足之所未至固未易悉其地之所有也然則書
法一書抑綱目之不可無者乎後之人有如左氏公穀
者操戈而出則非區區之所及知也

國朝名臣事略序

聖元基朔方立人極世祖皇帝混破裂而一之廣輪疆
理古職方所未半其天地之再初乎渾淪所鍾命世卓

絕之才實輩出輔成之故盛德大業之所著自昊窮生
民未之有也然而百餘年來元勲偉績世未盡白故知
老者湮沒無幾家乘志銘不能家至而遍知也仁皇御
極勅太史傳功臣而玉堂秘奧世莫得而見焉監察御
史趙郡蘇天爵伯修輯國朝名臣事略十五卷湖北憲
刻諸梓徵叙其端有壬在京師早知伯修之學而未知
其有是編也惟其培學上庠歷史屬久故考之也詳擇
之也審其類例倣朱子言行錄條有徵据略而悉豐而

核其四方之爭先快覩者乎竊惟國朝真才雲集是編才四十七人有齊民知名而未錄者蓋朱子例嗣有所得當續書之也若是則四方之快覩者不一伯修之學其益昌矣又不知今士大夫用心如伯修者幾人世所望於太史氏出於事略之外者其將有所屬乎憲長都哩哲伯幕府李穀王大有職風紀育人材俾覩者率作是亦韓子所謂牽聯得書者也

安南志略序

士為學當籠絡宇宙天之所覆宜皆知之而或窒於遐
泄於邇里閤見聞有弗深攷穹壤之外渾淪之墟尚可
知乎淵明覽周王傳山海圖以自適其胸中之竒高世
之致可想見已章亥所步予無得而究焉其得而究則
士名者可不知乎安南見虞書漢唐來職方氏物也宋
未平納款於我列聖容煦示王者無外而已非有所利
之也然其山川郡邑之所直風俗之所尚物產之所宜
雖職方氏有不得而詳焉載籍雜見非習其土罔克傳

信會而定之博洽之士病焉東山黎景高其國人也習其土者宜莫景高若也入中國五十年采之載籍參以所習為安南志略二十卷至順初朝廷以制作上之於是景高之書與其名不朽矣好事者將板之世乞予序之夫自成周九譯入貢二千五百年中雖叛服不常亦中國德化厚薄之所致爾我元之興不招而來厥後自啟邊釁我則威之其來格也我則懷之此我元待安南之大較也至於出師遣使之旨招諭錫賚之恩與其臣

屬始末之情狀是書一出槩可考焉景高在其國佐彰
憲侯陳鍵幕乙酉內附其國邀擊之彰憲戰沒景高抱
其屍馳出瘞之坵溫懼夫忠義之湮沒也故紀錄尤致
意焉其氣義又可知矣然則是書之出不獨知異域之
詳又以見人心天理之同者固不間於遐邇也其亦有
補於風化者乎

琴泉先生詩序

漢陽文學掾湘瀏劉喙光遠氣豪而溫學充而貞與之

游知若人游之久知若翁翁字山甫蓋今之隱君子也
昔長沙趙公平遠典型一時尤相厚善家貧有襟量士
大夫過者無不款接藏書教子掃絕塵俗惟癖於琴平
遠號之為琴泉先生其有得於琴乎古者成人以樂養
其性情而蕩其邪穢今則無矣鄭衛嘈雜萬耳一聲聲
之正者獨琴近之故嵇康嘗謂衆樂之中琴德最優幽
人高士養心理性舉有託焉平遠多藝尤精於是度曲
審材斲削漆絲悉身為之顧挈是號而被之則其能可

知己天下之水泉為勝水之源也海雖大受外所輸非其自出也今夫發而涓涓流而滔滔微而為溝池瀦而為江湖以輸於海而無窮皆吾之所自出取於內而不求於外者也而其為水也猶雨之始隕於天潔而不汚者也易象蒙中庸時出孟子之有本皆有所取琴則何取焉豈以其始達也歷澗谷觸崖石淅然鏘然幽響振越和之以清風亂之以松聲山空夜聞其有契於吾琴乎抑絲木為聲假於人以發者也泉自然者也愛而不

可挈也寓諸器而寫之泠然流出於絃徽間彼有無窮之流此有無窮之聲聲與心會物我兩忘不知琴之為泉乎泉之為琴乎山甫之為琴泉乎琴泉之為山甫乎吾聞其人淡然無所好豈屑屑於藝者寓意自適以發其胸中之樂爾年今七十二飲食起居如少壯時其又有得於琴之外者乎予以平遠之交知其友之端以光遠之子知其父之賢故喜為序之

宋誠夫文集序

延祐己未贈翰林直學士諡正獻宋公誠夫偕其弟顯夫始入京過予陋巷一見如平生出所著曰千樹栗者視予曰京師吾鄉田廬盡廢江湖二十年儲蓄歸為恒產獨此爾閱其帙知其學已充文已成謂之曰君之產不但與千戶侯等將與萬戶侯等承乏山北憲幕歲辛酉當大比時語同官第一人必在誠夫已而果然為御史為左司都事皆與予同事當大廷議論不顧忌絕去儒生拘迂懦訥氣習若老於吏牘者仕至國子祭酒而

病尋卒於位既葬顯夫出所為詩文監察御史上之臺
臺檄山南憲下所部刻之梓而俾予叙其端夫士之生
世生有聞於時沒有垂於後是不死矣而士之垂世者
未可必其必傳而不與草木俱腐也至於誠夫之文則
吾知其必傳焉待罪中書每館閣論材未嘗不為誠夫
歔歔使天昌以年則其長翰林集賢亦猶昔之意其魁
天下也不幸用之未嘗盡其材而幸得顯夫為之弟使
其文著於世傳於後又類所刪文若樂府為別集片言

隻字無所遺逸顯夫可謂能弟誠夫可謂不死矣誠夫
自選其文更千樹栗曰至治集其傳不待予叙也獨列
其守官梗槩使讀其文者知其政事之長而信其見之
文者非空言也顯夫今監察御史文如其兄二宋之名
於是益著矣

智子元越南行藁序

鎮陽智熙善子元以多學濟卓犖之才大德間宿衛春
宮冀速化行其志命與時左為南臺行人轉掾史又不

樂棄去令太師秦王右丞相為南臺大夫知其才居中
書擢西曹掾皇上即位故事遣使頒朔安南行者超三
級歸不駁降故自售雜還而薦私者亦復沸騰久不決
乃合議堂上丞相曰智子元可欲行者與智面校優劣
衆口始塞於是子元以禮部郎中佩金符為介使以行
既反命出紀行詩藁徵言表之禮諸侯即位小國朝之
大國聘焉況天子即位乎諸侯之於天子比年一小聘
三年一大聘五年一朝况蠻夷小國乎安南先宋納款

我不拒之天下既一彼復反覆我不銜之褒嘉錫賚不吝也然自世祖時召其主入朝而為辭幾易世矣世一乘王且不能行而朝廷每勤行人涵容煦育大抵以見我元之天地其量也觀子元詩其處之之道大較已見矣今年五月二十五日掄才大安閣下予首舉子元甚力丞相喜且云子元佛法亦通宜亟用之而下坐他有論薦可否持久俄丞相起遂輟凡使安南既酬美官子元獨留滯餘一年雖然丞相不忘也一旦柄用其亦自

行其詩乎讀之竟序而歸之

左丞張武定公挽詩序

大德五年朝廷有事西南夷江陰水軍萬戶張公特鎮通州年六十五在行主帥憐人且宿有隙公策可決勝皆扞格不入賊圍帥急公發三矢斃三酋解其圍帥復遁去公死之倉頭張如山負公屍歸孤漢走赴及瞻如生葬京城南中曠里先塋朝廷錄其功贈宣忠秉義功臣資善大夫湖廣等處行中書省左丞上護軍追封齊

郡公諡武定通人立祠奉之詔為功臣作傳漢狀之太史而太史張起巖又銘其碑漢曰史若碑固傳信來世而史嚴金匱碑在兆域何由周及鄙誠欲速託之多詩公其遂名天下乎於是凡識者又請歌之聞者從而和之積久充溢則為別卷俾有壬為題辭嗚呼孝子之於親其心庸有既乎親之喪雖一而喪之遇則異親有疾視起居奉湯劑始終無毫髮悔不幸考終念罔極之德且創鉅欲滅況李溝感截畫之痛於終天者乎起居不

得而視也湯劑不得而奉也聽而不可聞也望而不可見也追而不可及也則惟有知善而傳以顯於世者猶可及爾故一人知之不若天下知之一時知之不若後世知之使天下後世知之必其人功烈之不可泯人心之不容自己者是固不可力致也而不能不致者孝子仁人之心焉古之人臣功德在載籍者君子知之庸人不知也有婦人小兒田夫牧豎皆能道其姓名者豈不以傳之者衆感之者深乎人之志發為歌詩衆聲鏗鏘

流播遐邇動盪心目淪浹肌骨文之感人易而入人深者也託之以傳於天下後世則吾親之亡猶存矣公少能脫人於獄南征北伐皆有功老能奮身死敵可謂忠矣漢起家拜南臺監察御史遷內臺風采振揚號才御史所蒞有稱以集賢直學士亞中大夫致仕有壬入京一見相知延祐二年冬嘗為之作挽詩矣今二十餘年而集賢之衰老益不替可謂孝矣噫天地無窮詩歌亦無窮孝子之心庸有既乎然則武定之忠集賢之孝皆

可歌而傳者也有壬特與之為糠粃云

李遂初文集序

有壬總角師廬陵李秋山先生讀書零陵後識其從子
遂初於京遂初知予予未知遂初閱二十五年辱惠書
武昌始知其學之正文之粹而寧知其行之如其言乎
及來湘南士論籍甚又知其行之如其言也遂初兩為
邑教作新學宮武斷吞學地前官不敢與角則挾而出
之長岳麓山外侮內訌勝以定力終更帑有餘鎡廩有

餘粟以貫石計各若干非毫釐不私其能積多若是耶
嘗論校職明天常以淑世作人以資用他莫重焉而世
每易之易之者非也使人易之者何哉教事不修摧廢
不葺惟既廩是徇若然則不但易之而已也其視遂初
得無愧乎江南士名者例為文能者鮮矣能者有之及
施於事猶畫工不知梓人之制繪為宮室跂暈炫爛按
圖作之則焚錯迷謬矣士有能文而施之不悖者予固
願見而樂道之况師家佳子弟乎承示文藁為序其端

讀之為竟正者益熟而粹者益昌矣蓋源乎經而委乎
道宜其施之而不悖也始識遂初而不能知知而不能
得其詳得而不能振起之獨幸得序其文予其有愧於
遂初乎

至正集卷三十

欽定四庫全書

至正集卷三十一

元 許有壬 撰

序

陸宣公奏議纂註序

鄭春潘仁彥賓為陸宣公奏議纂註南臺御史上其書
且薦其才可職校湖廣省調寶慶儒學正而移其書中
書下館閣校勘館閣題之湖南僉憲高昌赫公國寶尤

愛其書請予序將刻之余惟三代後賢相世有其人然
匡輔之業功於一時謀猷之文功於萬世有其業而無
其文者多矣有其業而有其文可施於一時而不可施
於後世者亦不少也至於施之當時而已效用之後世
而不竭矚然與聖經賢傳並立於天地之間而不悖者
獨陸宣公奏議為然爾東坡以為古今之精英治亂之
龜鑑豈不信哉國寶始作邑即有聲為御史兩臺僉江
東憲移湖南聞其能政而不及叩其所得及觀是舉則

知其有得於是書深矣夫舉是書而施諸用君可以為
堯舜臣可以為臯夔稷契況一道乎國寶以其用之不
盡也大其傳使人有是書得其位而施諸用則疲療尚
何患乎不蘇風俗何患乎不淳而天下何患乎不治其
用心亦仁矣余聞部使者率榜笞彈黜是急國寶獨汲
汲於是蓋有見於遠者大者繼今樹立其可量也哉

送陳季和序

大德辛丑有壬侍先公官衡陽鄰安仁陳君季和館見

其學與之交石鼓鴈峯花藥之勝時往必俱詠歌倡和
無徒嬉也得薦待試季和又同剡乙巳余隨侍湘潭別
馬季和取李陵詩努力崇明德皓首以為期為韻作十
詩始以責善中以期待終以惜別有車笠不我忘寄聲
長相思之語當時讀之已為悽惻丙子歲始會京師俯
仰之間三十二年矣人生能堪幾別哉而三十二年中
江湖風雨悲歡得失不知季和有詩幾千百首能盡述
之也余僥倖逾分中間父母兄相繼傾逝追思昔同遊

時在具慶下讀書外百事不關慮其樂終吾身不可得
矣故余雖樂曠久之會遇而又有深悲者焉季和歷邑
郡校官當陞教授教授員浮於缺數倍在昔有皓首不
調之歎至治辛酉選部以巡檢則缺浮於員始議借注
以八品借九品而當時執政且謂巡檢為流官教授在
流外戛戛靳之予時主事天官力辨於堂九品監當中
州得借孰謂八品師儒且置要荒而反不彼若乎其議
始允選部行十六年季和今借授寧都巡檢始釋褐矣

聖朝列聖崇儒今上諄諄播告在天下耳目而姦人抵
巇賢書遽罷天威赫怒罪人斯得成規治具駸駸乎復
矣以季和之賢之學髮蒼蒼而方試一命局已定格不
得施其長天下之知季和者莫予若而予又執政乃處
之若是其愧於車笠之語多矣尚欲膠榮以妨賢路乎
然而在于則誠有歆然者在季和則何慊乎哉素其位
而行抱關擊柝雖賤必敬況綠袍挾弓矢率求盜為人
除害者乎使一方盜不作必擒民得以安其田里是

獨不可為政乎古之君子其取也廉而其效也博今之君子其取也肆而其效也畫季和為古之君子而予為今之人也昭昭矣於其行為之列昔日之好與夫今日之可悲可愧者為序以餞之

玉淵集序

衡安仁陳雍季和奉其父翼鄉先生玉淵集請曰雍先世弈業擢第里人號所居青雲里吾翁有聲場屋世變隱居百念蕩滌獨不能忘情於詩幸哀而表之翁其託

以不泯乎予少在衡與季和游獲拜先生先生頎然一偉丈夫蕭然有林壑姿聽其言藹如也李玉溪世傳得道先生從之游得其學視世聲利敝屣之不若予時甫冠不能問且銳於進修未知世事之真可輕也今讀其詩而後知其人焉昔人言詩非能窮人窮者詩乃工然窮而工者多怨悵無聊之語雖強自寬釋猶賤丈夫忍怒形色有不可揜者今夫螢窓雪屋殘釭獨坐山莊野館風晨雨夜他人有不勝荒寒悽楚之態先生目之所

遇心之所觸形之歌詠冲融蕭散無一毫抑鬱不平之
氣始終卷帙無一章投贅奔趨之詩其所造不淵矣乎
至於夢中談仁則於信道篤矣其於方外亦寓耳先生
名一霆玉淵其自號也壽八十五而終季和能世其學
先生不獨昌其詩又昌其後而詩之傳益昌矣奚必予
託而後不泯哉

宣政使楊公行實序

西夏楊公安扎爾布哈延祐間為行御史有大姦席勢

惡竊鉅位人重足側目擊之不報遷內臺又擊之所恃
城社禁掖媒藥為譴出僉憲入二長右司皆有聞監憲
五道力農桑修學政勵風俗教戒家至乙亥七月上京
有東門之驚由戶部尚書拜治書侍御史俄除陝西左
丞未行政同知宣政院事遂升院使昔嘗以母老棄官
歸尋監河西憲無何改陝西行臺治書侍御史夏民惜
其去有釋之者曰公之道行於此夏人被其澤行於臺
諸道被其化立於朝廷則天下受其賜河西獨不在鈞

陶中乎序其說以餞持以示予曰之人之言予懼其浮
也不頌而規予望焉嗟夫呂鉅車舞世未易一二數宣
政公自河南監憲召為戶部自戶部四轉至一品位益
崇而心益卑名益起而心益修可與語大理矣士之生
世官崇卑不校也顧稱與否爾然器之大者其受必大
亦其宜也故施之高者其及溥發之力者其志遠使人
器之而崇卑之效不能無別焉朝廷以西夷素獷因其
教而柔之西若南幾千里戎馬部署分職大小皆付宣

政弄兵竊發則獮薙之其任亦重矣宣政修敝舉墜人
與其能予復何規規繼今可乎宣政位雖高任雖重然
外是則所施尼矣一旦置諸鈞衡首諸風紀以厚民生
以正教化其重不百倍今日乎且昔之為憲或隘焉部
若院或拘焉隘也拘也彼之宜此之戾也亦思所以宜
於此者乎挈其綱審其機本之以至公守之以至誠吾
之所施無適而不宜矣世之修飾為筌蹄獲其欲忘其
器謹於取怠於成者衆矣宣政毅不可奪夫人知之而

予又及是者責善之道也以是為規可乎宣政曰命之矣因是以為叙

贈寫真陳芝田序

翰林揭待制曼碩序寫真者稱錢塘陳鑑如父子獨臻其妙余不識鑑如識其子芝田丙寅歲嘗寫余真小兒始學語乳者攜而過即指且呼兒日見惟便服像乃朝服而瞥見識之於是知其得余之深也始余未相識人稱其藝又作余像始知其能雖知其能而未敢許其

至蓋余見識素淺且慮天下之大將無就其右者求卒不獲
又得曼碩之言始挈余信以被之為之說曰志於道游
於藝藝固後道君子取焉者蓋有好道而盡於藝者也
繪事亦藝也其天機之深物理之妙有非淺近之所能
窺者就繪事中人物最炫目近習工之尤難人知芝田
之工而不知其得於筆墨之外者且似者形也似之者
非形也神也形外而神內也外而最著者面也形至焉
內而最微者心也神出焉使心而見於面內而爆於外

其為道不既淵乎故有得其形矣而識者不以為似得其神則雖眉目之有參差容色之有淺深望而知其為某也芝田好論人賢愚壽夭貴賤有人倫之鑑故其所造不例人之難蓋相之與畫名雖異而理則一得於相而不能畫者有之矣未有不得於相而能深於畫者也不得於相而畫者不過為肥紅瘠黑庸史之筆爾以韓幹之能僅得趙縱之形昔人列吳晉而下名手才三十餘人卓然可傳又不過數人則寫照為藝豈易言哉若

芝田者蓋卓然可傳者已京師三十年畫富貴人不知
幾輩得金帛積之可大富而散若土苴受知延祐至順
兩朝才被一命世知其藝而不知其為僇人也故併
及之

送劉光遠從右丞相京序

衆星麗天而拱北辰百川行地而宗東海在人則朝覲
之義也臣所以竭事君之誠君所以豁踈遠之蔽舉係
是焉君臣之分立上下之志通朝覲之義大矣哉昔在

唐虞五載一巡狩羣后四朝周大行人掌大賓之禮以親諸侯侯甸男衛要地有遐邇故見有疏數焉書稱敷奏以言明試以功禮春以圖事秋以比功夏以陳謨冬以協慮不獨執贄備禮而已也秦既廢古後時有聞不常也我元之盛跨軼三代親王守分土非有命不敢朝官守居外者行省十行臺二長官秩一品皆帷幄重臣朝廷有大事則徽集親王大會京師陳祖訓申戒約鴻謨大法有古不及饗勞而歸莫不感悅而安其世守行

省臺則遣使入請臣某請入賀不敢擅奏可乃敢行或
易人惟命得請率僚屬奉宴幣給繹既入見以宴幣上
太官升辭為竣事饗賚之厚薄顧上之所知何如有壬
官京師竊聞老朝官言世皇時外臣入見必問部內事
甚悉部內事有利害可罷行悉敷奏之雖不屑屑四時
而其圖事比功陳謨協慮之意宛然隆古時也今天子
即位湖廣省臣以典故請右丞以上命行掾劉嘽光遠
以選從且行請曰嘽昔計偕而黜雖入京猶未也幸今

從右丞公入願勵不敏光遠進士除教授漢陽三年省
臣才之羅致幕下尤為右丞知拔行輩中以自隨今湖
廣控制地幾千里其最為民害者幾事其最為法蠹者
幾條省以兵聞四方果如所聞乎搖黎猖獗飛輓方殷
亦有道柔之乎右丞明習時務老於政者也此行見天
子必有敷奏而行之光遠亦思所以助其言而推其知
乎不然人人可以從公于邁也光遠是行觀朝廷之盛
歷山河之雄亦必充然有得措之事業若夫往來僕僕

目之所接心之所會但以資歌詠挈巨軸歸曰吾文士斯可矣則非所望於光遠也

擊壤同聲集序

聲在天地間為雷霆為裊崔竅穴為鳥獸之鳴與凡細蟲之可聞者為水之磯瀧物之戛磨雖重輕清濁和戾之不同其出於激一也在人為言而行不與焉言有喜怒皆激也而精者為文文之精者為詩聲而至是萬物之聲蔑加矣康衢之謠擊壤之歌其淳未漓其朴未凋

其發於聲洪麗渾厚而自然之文實具於中及靡靡之聲作淫哇嘈雜天下化之雖以小雅不免怨誹况騷乎况降而益下者乎江夏熊君堯章讀書不仕喜作詩無愁憂促迫無聊之聲彙其所作號擊壤同聲集盖言生太平之世安於耕鑿猶野人自樂擊壤於堯天而欲同聲相應於數千載之下也聲同矣樂有不同乎詩特其寓爾昔康節伊川名擊壤不獨同其聲直與之同其天與康節伊川同其天當自知之求予序因以勉之

壽慶集序

予至順癸酉記孫義方壽慶堂繼為文頌以章其孝者
聯編累牘義方錄以寄予京師予因喜其母健而致文
日富也戊寅予南歸則其母已棄養矣其友萃為壽慶
集求序其端嗚呼昔之壽者今無所見矣昔之慶者今
為創鉅哀苦矣則斯集也非蓼莪之詩乎世有養不待
而為終天之恨者義方及養而母又壽逾九十有子有
孫若可無恨矣然孝子之心失親一也寧計其壽不壽

哉且及養而壽哀且若是則不幸不及及而不得終焉者其為恨詎有已耶則凡世之幸而及養者可不竭力以篤愛日之誠思其不可復者而先施哉予永感之人追思昔時及而不及者多矣身不及矣而竊有望於人焉書以為壽慶集序

大元本草序

淳樸散而後人始疾醫藥盛而後疾始熾醫藥罪乎非也不明者之罪也醫必方方必藥而良惡之異性風土

之異宜真贗之異用必本草而後知和扁神藝藥非精
良疾不能已然則藥有本草猶辨貌有鑑出師有律其
醫書之近而尤切者乎自一日七十毒後究心遺經三
卷者梁之陶唐之蘇李蜀之韓宋之開寶嘉祐諸賢增
三百六十種至一千八十二種可謂詳矣然梁限於江
蜀局於西南宋畫於白溝唐雖一天下其讐翔漠一時
懷柔不能一家也則異方物產有不得而悉者已開闢
以來幅員之廣莫若我朝東極三韓南盡交趾藥貢不

虛歲西逾于閩北逾陰山不知各幾萬里驛傳往來不
異內地非與前代虛名羈縻而異方物產邈不可知者
比西北之藥治疾皆良而西域醫術號精藥產寔繁朝
廷為設官司之廣惠司是也然則欲廣本草以盡異方
之產莫若今日也聞諸故老至元間嘗議及是而後不
果明陽朱轅仲侔述大元本草求序其首書有三綱九
目其明部屬謂舊本始玉石人部居草木後為失次萬
物人最靈乃始人部餘各有次而終以鬼疰人部首列

內外景圖詳疏其下舉元命之秘生死之關昭揭諸世
蓋欲使人人自知有此反而求之則養生得其本外邪
何由而入扎瘥何由而至醫可不用矣其不能也則醫
不得不用藥不得不餌而吾之本草不得不明焉始則
教之以不病之要終則示之以必效之藥其用心可謂
仁矣昔人窮一經且皓首此尤難焉詩人多識鳥獸草
木之名其性若味未必能識也唐宋修書必集衆乃仲
倅自少至老獨力攻此可謂勤矣又有外部餘部以其

多產異方商賈所不售知識者少但錄其名物治證而
不暇有所考覈此則予之切切者也仲侔將奉此書上
之朝廷竊意大醫使因是成書裒異方之產前代之未
聞者萃為一書則可以軼宋唐而信後世矣是之謂大
元本草

至正集卷三十一

欽定四庫全書

至正集卷三十二

元 許有壬 撰

序

如舟亭燕飲詩後序

京師據山川形勝四方舟車之所會風物繁富古今莫
加焉北腊西釀東腥南鮮凡絕域異味求無不獲九州
風土所有土人未及一見而已飛聚於陸海矣士大夫

良時擇勝治具合朋舊叙契闊勞勤苦滌滯慮信可樂也而牽於事役鮮克稱遂四時節令有不知而過者湖廣省掾汝南周子嘉出詩一軸十四首蓋其在京師至順庚午歲中秋重九會諸公如舟亭所賦也分韻者九人學士宋誠夫嘗與余同在左司少監歐陽原功實同年修撰謝敬德同歲得解亦皆同時官京師追念昔時未嘗得此樂也或撥冗鼓勇強謀一歡搏沙捕風左臂右掎百端敗人意則此會之見於歌詠而子嘉什襲以

為美談宜也就九人中原功又不與詩乃追而補之者
也卒未予入京見三君不得盡一語而歸况燕會乎予
則歸矣不知誠夫輩還數數得此樂否子嘉求書其後
予雖當時不與斯會而附名卷末亦可以如原功矣

王濯纓集序

中原自宋播浙文教幾熄金源氏分裂之餘設科取士
士氣奄奄僅屬而吾鄉登第者餘五十人聖朝戊戌之
試復其家者子孫於今賴之至元間一時名德遂傑視

他郡學者觀感日益以盛是蓋山川清淑之所鍾濟以前輩承啓之有素非世變之所能易也若濯纓王先生穎悟力學聲華充溢拜南臺御史僉江東道按察司事投紱而歸讀書講道發為文章蓋資之有源者也先生歿子植仲武索遺藁得古律詩並長短句若干首走書屬序將壽諸梓有壬每恨弗獲親炙鄉先生兩至先塋皆衰經從事不敢有請仲武能不泯其親之善而揚於世可謂孝矣詩之雄渾而清健長短句之婉麗而飄逸皆

可傳者也眉山長公謂君子用心固無所私愛而於父
母之邦豈如行道之人漠然而已哉有壬喜吾鄉文教
之有素而又喜是集之出吾鄉之後進益有所取法矣
然非一鄉所得而私也有壬辱後進竊願附名集中是
區區之私也先生諱可與字晉卿濯纓其自號云

送馮照磨序

仁宗皇帝之圖治也謂仕入多岐不基於學病治為甚
排衆議出宸斷繼世皇之志始以貢舉取士蓋中原自

金源氏滅貢舉廢且百年故延祐癸丑詔下天下聳動
思見德化之盛復限吏秩廣儒用默寓消長之機焉聖
人之心其至矣乎亦惟秋谷李公懇懇於播越在淵時
一旦爰立大議遂定上而大臣且笑且怒下而素以士
名恥不出此亦復騰鼓謗議贊其成者才數人爾士出
門持數幅紙始終綴文才十一首即得美官拔出民上
矣彼輦金舟粟費以萬計得一命尋復奪之而吾一毫
無費也胥吏輩自執役幾轉而得祿少不下廿年始出

官而吾自鄉試至竣事才十月爾則吾之報稱宜何如哉乙卯迄今六科內而才學名者可數也外而政治聞者可數也昔有人取凡敗於貨賂厥官者列於朝繼自今有賊雖輕亦坐不叙其冒藉增年大非德行經術取人之初意事君欺君罪莫大焉督風紀嚴察之且言四書賦題世已括盡宜兼五經為疑問又言首科士無宿備而號得人今為師者教人以獵等為弟子但事套括僥倖一中其學如此其施可知請大更張之主者雖隨

事折之而當時大臣復有不悅貢舉限秩而用事者欲因而搖之周旋扶護而潛弭之一二人是賴蓋設科來列聖首詔必有因而搖之者庚申之春則剝復之機係焉癸亥冬惴惴幾墜列聖仁明不惑邪說以有今日士之揚揚一第者亦知其難若是而思所以報之乎吁天下之大由是出官者幾人多岐而晚之者如堵也予亦玷科第官且十一轉非曰能之知行之之難能懼而已泰定丁卯來鄂甲子進士馮君敬修為漢陽丞在府附

治且密邇二大府不競不柔上與其能而下多其惠再
為湖廣省照磨照磨秩視在朝非有聲揭於上不得已
抱利器施會計間省有事假一割恢恢乎游刃有餘地
也探其為學則宏而有源叩其為政則習而不拘其善
學而有得者今又代去秩益升而才益有所施矣江西
士淵藪也予恐其但知貢舉之易而不知貢舉之難敬
修歸而試語之使教者知淑人之大學者無欲速之弊
而仕者不入於可議則仁皇之心列聖之詔孔子之教

舉不負矣吾元貢舉將無愧於前宋盛時之得韓范富歐也予與敬修同出是途故敢及之敬修毋獨為君子而已也

朱本初北行藁序

韓愈氏稱嵩高張道士通古今學有文武長才以平生攘闢之勇許與之慎而所稱若此送廖道士則又疑魁奇忠信才德之民迷溺於老佛之學不出求其人如不及則知世之懷才抱德寄迹老子法中者君子惜焉余

早聞提點玉隆萬壽宮本初朱君之賢觀所作輿地圖
知其問學之博考覈之精今年過我出詩文一編題曰
北行藁者蓋其乙亥歲出山乘傳至上京往來之所作
也跋涉數千里間山川風俗民生休戚時政得失雨潮
風電昆蟲鱗介之變草木之異可喜可愕可笑可
略皆盡蓋其蟬脫聲利笑傲方外所持也專故所造也
至若高句麗之諷諭無愧樂天景州賊捕蝗行諸篇皆
拳拳不能忘情於斯世也後其家有示兒子楨詩夢寐

其兄有相依諧眷令語則父子兄弟之倫明矣張煉師
序謂老氏五千言皆治國治身之要飛騰不死之說無
一語及之跋陳秋嵒詩謂由儒入仙道故能窮理盡性
知所先後若是則本初之於老氏其善學者乎心之所
存身之所履則未始離乎儒也若夫絕去禮學兼棄仁
義果何道哉世不乏才惟師其師學其學而不能一焉
則泥矣自吾藩籬之外沃壤通達目如鹵莽往而不返
卒淪於異其可歎也夫昔秋谷李公當國一見本初即

勸其反初服本初以早奉父母父歿而不忍改也使本
初用世必燿燿可觀不獨詩若文而已秋谷之長於觀
人當益信於世也平生著述尤富此一歲之作爾書其
首而歸之

送蔡子華序

都省握天下之機十省分天下之治然十省之屬自筦
庫而上皆命於朝非若古藩鎮僚佐得自辟也得自辟
獨掾爾而復確有定式六部宣司史外已官復掾者又

居其半雖大臣保釐才德兼人不如式不能錄之也且
已官者幸蟬脫矣復聽從事簡書者蓋重其役而亦使
人益自重也人益自重則事可不率而興矣盈考優升
俾為捷徑人亦忘其重勞焉湖廣省號重鎮朝廷必慎
擇省臣省臣必慎擇掾屬南徐蔡君子華由校官為汴
省掾天歷初當兵衝時與敏給至順壬申予過南徐始
識之今戶部侍郎萬國卿實汴省郎中具為予言繼擢
湖廣儒學副提舉改徽州路知事將行省臣才之又屈

為掾曹務劇者率畀之震怖而不為之動紛糾而不為之亂聞於國卿者見之矣古下士而下雖胥吏嗇夫雖秩有崇卑莫不學古入官素其位而盡其事無殊軌也漢稱緣飾若離而尚未遠今則判然矣挾兔園冊四體不自舉固不知修齊治平為分內事而筐篋剔剗自謂足以了天下務其佔畢伊吾至目能有識手能有執亦何從而得哉獲其榱桷而遂詬大厦濡其涓滴而遽訾滄海尚可望其能國哉子華儒也兩屈於掾皆以能稱

事益練智益明吾知其有以服彼而自此升矣鄂士大夫惜其及格而去也咸賦詩以贈之屬予為之序予知其賢故不辭

鄧或之詩文序

廬陵鄧或之詩文予同年馬伯庸有序其里人孫義方又以委予逃暑山中挾之行始得盡讀或之有異稟承家學濟以勤力幼已有能詩名長復淬歛其文造益深而出益工矣方貢舉行躁者率擗撻直罇置畧獵科茫

不知有他路世一以罪科善學者不爾也或之迫養為
科業不為苴獵其文可徵其言前世決科無聞詩人一
語千載不廢蓋有激焉科既格一乃心力增其已高濬
其已深以極其所至將不啻詩人一語千載不廢苴獵
偶得孰與吾得之多激有不平矣乎吾願或之之益進
於道也進於道舍柳子之所本皆末矣或之進未見止
故敢舉以為助他日尚能為君序之

江漢集序

江漢集者鄂省理幕湘瀏劉君光遠之所作也初光遠以碩學俊才得解湖廣俄奏除漢陽郡博士一時有不及光遠遠甚得乃過之得而棄其業如遽廬而光遠職師一郡既以教人又以自益其文遂昌於江漢又能脫去科業氣習炳炳琅琅卒澤於理而能粹且潔也彼之得乃其失也而吾之得不既多矣乎而又求益不已不以望於人者望予予可孤其望哉夫文以明道而假乎辭也文而不至道將焉傳故有待於成焉本於經以立

其體參乎傳而暢其支而必力於多以熟其途而後可
以語成也孔明出師令伯陳情照耀宇宙動盪古今固
不在多予欲光遠之多者多則熟熟則自得而後有以
約於寡也多而不能約於寡者有之矣未有不多而能
約於寡者也東坡言詩非甚習不工要須日作一首文
猶是也坡之名世其亦以是也哉予他日將驗光遠於
江漢集之外矣

送劉光遠赴江西省掾序

泰定戊辰始識劉君光遠於鄂時教授漢陽積習率年
既廩乃毫粒不私職日以舉湖廣行省器而掾之盈考
貧不能赴調封所由寄予予待罪政府負天下寒俊其
有基可植者則未嘗不力仕籍變化朝著為速主者尤
靳非力取不可得光遠得湖廣行省理問知事中書復
聽奏可治外而實視朝著也理總一省推鞠部內事不
能決者舉資折衷其辨於幕人皆直之將代江西行省
又辟為掾夫官坐而治吏立而趨官九品亦有立而趨

其前者吏雖大府崇秩其勢不得不卑士不得已假途
焉坐而治矣復立而趨何哉如制七品則推封其親光
遠父母皆八十屈為掾則一躍可至他官非十年不可
其志亦可憫也哉予不能指其行獨有以勗其行也學
不間於仕不仕學優而仕仕亦學也上而致君下而理
財治獄簿書期會之際質吾之學其不戾也然後行之
則吾之學可驗而實矣光遠昔試藝幾千人中出金於
沙可謂難矣况兩得乎其仕也所至以能稱推餘力益

攻為文章其進蓋未已也江西號多士可資以益學而其流俗以健訟聞仕其地者益不可忽予願光遠入於署則舉其事而資吾學入於家則繹吾學而待其事力有定而業不奪昌黎廢棄時日之好無功昏冥之逃舉不能抵吾巖矣且言不辱於難而辱於易行不毀於鈍而毀於銳是又原於學而委於是者也學之不已且至聖賢所以顯揚其親者大矣不但七品推封而已也光遠師視予予不敢好而亦不敢孤其請序以贈之

周絳洲詩序

詩難乎鄙人女子率爾成章詩易乎千百年文人才子
雕心剗胃白首不能已率爾成者後世無以尚雕心剗
胃而論者千創百孔漢魏而下可考也詩有時乎唐虞
賡歌後有三百篇三百篇後有騷騷之後有漢魏有盛
唐詩有地乎譜江西者雖曰人不皆江西詩皆江西四
洪徐謝詩果皆江西乎謂形異味同味果皆同乎由是
言之謂之難不可謂之易亦不可論以時不可論以地

亦不可顧人心所得何如耳宋南渡放翁後詩可數及其季世溺於所習工者尤少而人心之詩未嘗泯也茶陵周柝洲先生當陵谷變遷之餘胸中之蘊一發為詩惜其逸而不存也存才三十餘首莫不峻潔勁秀抑揚頓挫風神爍爍不可掩蓋脫略難易不局時地而得於心者也其孫泉請予序一閱而為擊節三復而悲之世無采詩官逸者不少微泉不幾於俱逸乎杜荀鶴謂妙在一聯况三十餘首皆可傳者乎柝洲可無憾矣

論語衍義序

古經子傳註之未盛也人所以傳名家其從授諷誦者
淪浹肌骨終身不忘沉潛反覆必有得而後已及剖析
爛漫文益繁而道愈離學者恃有成書不求之心而悉
委之目是故傳註盛而後學者始怠呻佔畢而習者且不
可得而況有得於心者乎而况蔽苗秀混涇渭知所擇
從而至於道者乎河南二程夫子出而後聖經復明子
朱子沂程源而上之挈百家紛紜之說擷其長而萃於

正四書集註精密嚴簡信乎為萬世不刊之書也其有
機張而不示於度者蓋欲學者自得引而不發躍如也
昔之註傳可同年語哉學者誠能虛心切已不以尋常
易之則終身有不容自己者焉余觀柴君希堯著論語
衍義十三萬言本之程朱申以證據斷質明盡可謂勤
矣由傳註而有得且有以自見於世雖若架屋疊牀其
視目傳註而怠者大有逕庭矣然而傳之遠者漓其淳
言之繁者支其體希堯之先其學出於饒雙峰雙峰出

黃勉齋而勉齋則親授於朱子所貴乎後之學者因其
流而泝其源則不漓不支矣

至正集卷三十二